

TESTAMENT VECIA POPA 2014

Bondì compaesani - son qua, son rivada,
in diese ani - l'ho imparada 'sta strada.
Ma gnanca sta olta – che l'e el me aniversario
me sa che me sparagne – el me solito calvario
e sì che per la festa - v'aé porta anca n'dolce bon,
ma me l magnarò mi – prima del fumeron
Saeo, da na banda - sparì no me indispiase
Se pense a voialtri - ke a sta qua no aè pi pase:
nte 'sti diese ani - ò vist ben pok de bon:
ogni an ke pasa - pi poreti deventon!
e per quant che tuti i dì - la dent la se lamenta
somea che i fae de tut - per daghe ados a chei che stenta
Già se pagon le squaze - quasi a peso d'oro,
ma guai impiantase - a fa calke laoro:
se doi seci de malte - te toca butà,
i te trata come kei - ke va par carità.
E se i sedese Comun - le malte no i le ol
pagaron i privati - ke kei i se le ciol!
Aèo mai proà - a butà ia calke inerte?
i è la ke i te speta - a braccia conserte.
I è svelti come gat - se i toca te aiutà
ko i a movest el cul - te è belke caminà.
I à metu conteiner - per la differenziada,
ma na roba logica - no i la à proprio pensada:
come se falo - a trà ia stramaz
su par scale gerte - come i prà de Colaz?
E no i podea mete - ki vascoi 'n cin pì a livel?
Per butà ia le squazè - te toca fa 'l budel!
E a proposito de aqua - sione in man de ki?
De enti ke i la crese - ogni secondo dì!
I sbalia le leture - e a mete i contatori,
ma se te reclama - i à 'ncora reson lori!
Co era el fontaner - l'aqua no fea mal:
ades la pagon cara - e po' beon la mineral.
Co 'l piof en cin de pi - l'acqua la se inquina
per depurala in presa - i ghe donta varechina!
E po'con tutta l'acqua –
Tuti ke se lamenta - de 'l temp ke no 'l aiuta
aseme ke ve die - la ghe ocor proprio tutta!
De nef chesto an – ghen sarà vegnest en grum
ma l'e anca da spetaselo - in Provincia del Belun
ché no i ne fae passà – come evento ecezional
na bela fiocada – sot le feste del Nadal
a evità che i paes – i reste senza la corente
fursi bastarae – na gestion pì previdente
saralo mai quant che no i fa pì manutenzion
intorn ai tralicci de l'alta tension?
perché me toca dive – sié mesi proprio mal
se se ferma anca Luxottica – a doi barc da na central
elo mai possibile – con tut chel che pagon

che i ne riserve sempro – tute ste atenzion?
Dai tempi de la Genesi el temp el desfa e 'l fa
e per fa come che el ol - el è restà da maridà!
I omi d'altra banda - no i à fat compagn?
I sfruta la tera - solke per el guadagn!
Vardè ko 'ledilizia - in Agort fali ke?
I fabrika anka onde - ke posto no ghe'n è
ma solke roba granda - condomini koi soler
e po'i te tira mostro - per rangiate 'n galiner!
E no stà proate - a fatelo da sol
o t'à impresa e carte in regola - o proprio no te pol!
A fase i laori - anka un ke a zata
i lo sépolis - sot la carta bolata!
I se fida de sienziati - ke su le carte i lede
ma kel ke succede intorn - no i sa pi da vede.
se in mez ai sgrasoi - i àsa fabricà
se incolpa la piova - se le case se à inlagà,
e i fa su sot a le rive - taiando le radis
se po'vien do le boe – i dis ke no i capis
In Agort l'è difizile - aé momenti de ritrovo
pi fazile ke i critiche - se te fa valk de novo.
La podarae 'nda pedo 'n te i ani che sarà
se kei ke me parecia - i ol impiantà là;
ì m'a dit ke i è veci, le forze le ghe cala,
speron ke a calke doven i ghe pasè la bala.
Me rincresarè che na tradizion ke agrega
la dovese 'ndasene fora per la bregia.
Me piase ke ai tempi de tablet e internet
per godese e catasse ghe ocore po'poket:
intorno a mi vecia, de peza e de carton,
'lè le frazion coi cari e la popolazion.
Oi proprio faghe 'n plauso a chi che me fa bela
parkè 'sta nòsa usanza no reste 'n te casela;
dei ani otanta el Toni s' a proà resusitame,
ma per le masa cruzie g'aea tocà lasame
mancomal, ke'l era calchidun ke aèa memoria,
ke 'l è tornà a catame 'n te le pieghe de la storia.
Per fa kel ke ocorea, 'l Giorgio s'a dat da fa,
e a 'sta rogna de na vecia, la os la ghe à tornà.
Ve recorde a tuti , ke un de i me dover
l'è ke me toca fave 'n cin da carbinier
mi son en cin come 'l Grillo Parlante,
e le robe ke no va, ve le die tute quante!
Ai tempi dei tempi mi nasèsta son
per dighene quattro a siori e paron.

Na olta 'l an son chela, che al popolo ghe da òs
e tuti i potenti i mete 'n cin in cros.
Son curiosa de vede come che la meton
visto ke 'sta olta ne toca le elezion.
I me a contà che liste 'sta olta ghe 'n è tante
speron ke i ne presente 'n programma interesante!
I è sempre ke i se lagna, nesuni ke ol fa,
però per la cariega, co ocur ì è tuti la!
Me augure ke i mete 'n cin de orden 'tel paes
e ke a la sicureza i ghe bade pi da spes:
i me dis ke la Contrada le è pedo del far –west
e la sìe frequentada da gente con pok sèst:
in te na botega ì a fat na rapina
la matina presto e ko la carabina.
Onde 'ndone a fenila, deme reta 'n cin
se i ne porta ia anka 'l Gesù Bambin?
Me recomande al 'nof Sindaco, ke el fae na roba bona:
ke 'l mete telecamere de chele ke funzional!
E ke 'l se fae capì ko le parole ke 'l dis
parchè el Sindaco de ades, proprio no se 'l capìs!
'N altra roba 'ncora ke tocarà 'sta atenti
'l è a la Strutura Non Autosufficienti:
la ULSS ormai 'è chiaro che la ol sbolognala,
ì, Sindaci però no i sa come ciapala.
L'ultima saùda de la nòsa sanità,
l'è ke la guardia medica i ne à tramudà:
così se calcheduni dovese ciapà mal
ghe toca cenì duro e rivà fin su in Canal!
L'aèo sentuda 'l ultima? 'L è fora la òs
che sìe i archeologi che scava in Pian de Cros!
Me son tant domandada chel ke i zerkèa,
cande ke è sentù che i cantieri i li blochea.
A ride da sola me ò catà,
Ko i m'a dit ke era i sas de 'n salesà!
La Sovrintendenza fa valutazion
E no i la fenis pi 'sta circonvallazion!
El campo de balon ì à inaugurà
a la presenza de le autorità.
Spere che a 'sta erba i dae concime rinforzante
parchè ke i sarèe boni de coltà col diserbante!
Ke no la toke come 'sto an pasà
Ke al campo de alenamento 'l erba i ghe à brusà.
La ultima che ve conte, la è da sgrisoloi,

per 'na olta no son grama, de brusà sul Broi.
'N ' tel zimitero novo, par ki ebe catà,
intro 'n te le tombe acqua a volontà.
A sto punto son contenta che me brusève voi
pitost che le me ceneri le fenise in mò!
Ades ke ve 'n è dit tante ke tera,
ve salute tuti e a s't altra primavera.